

Mbanjcuengh Gyaeunde

□ Lij Banghgyangz Luz Yaujli

Siengj mbouj daengz, Dahlien zig sangj couh dap naeuz: “Haengj ha! Gou couh mbouj saenq lo, saedcej ciengxlwenx cungj dwg yienghneix gungzhoj roengzbae?” Dahlien mbouj siengj saek yaep, hix mbouj leixlangh doengh cungj gungzhoj roxnaeuz fouqmiz saekdi.

Mbanjranz miz cojcoeng Boux-cuengh, ranz engq miz bohme youq, baenzbaenz cungj dwg aeu baema ya, Daegmingz caeuq Dahlien song vunz naengh banci daj Haijnanzdauj ma daengz yienhsingz le, youh siengj mbaet di cienz he, couh song vunz byaij roen baema mbanjranz.

Mehmbwn mbouj hai da ya, bienbien doek fwnmoenq mbouj dingz. Daegmingz caeuq Dahlien rag doiq haiznaez vad daengz bakmbanj seiz, cij yawjraen bakmbanj dauqcawq cungj dwg haexvaiz haexmou uqatat, baenz raq baenz raq heiq haeu cung daengz dangqnaej vunz cungj yaek rueg bae.

Daegmingz mbouj ndei eiqseiq cam Dahlien naeuz: “Mwngz souh ndaej doengh cungj heiqhaeu neix lwi?” Dahlien cijdwg gig geizheih dwk muenghyawj seiqlengq, mbouj hoizdap gij vah Daegmingz.

Ciuq baeznaengz yienghsiengq, baihnaj douranz roxnaeuz daxhongh haengjdingh hix dwg haexgaeq haexbit baijlele, youh uq youh haeu raixcaix, seizhaenx, caeklaiq bohme ciep ndaej gij saenq Daegmingz le, senq baet cingh baihnaj douranz caeuq daxhongh lo. Caiq gangj, bohme caeuq caencik Daegmingz cungj ok bakdou ranz daeuj angqcoux Dahlien, hawj Daegmingz caeuq Dahlien roxnyinh sim raeujrubrub, maz sinhoj caeuq naetnaiq cungj gag buetdeuz liux lu. Yawjraen ndawranz lij baij miz

aeu densi ndaemhau caeuq aen danci buenq gaeuq buenq moq ndeu, ndawsim Daegmingz cuengqsim ndaej lai lo.

Neix dwg Daegmingz sien sij saenq ma daengq ndei, hawj bohme guh ndei caepcawq hane, yawj hwnj-daeuj, bohme caen dwg caenhrengz banh ndeisae lo. Hoeng, caeuq ndaw ranz Dahlien doxbeij, neix cingqcaen dwg cengca ndaej daiq gyae lo. Daegmingz caen yousim Dahlien souh mbouj ndaej gij fouq gungz cengca gig haenq neix, gangj mbouj dingh song vunz aiq deng cuengqfwngz faensanq ne.

“Ndawranz mbouj lumj mwngz gangj yienghhaenx gungzhoj baenz youqgaen ya.” Dahlien mbouj leixlangh Daegmingz baenzlawz siengj, lij doq yawj doq doiq Daegmingz naeuz.

Dingqnyi Dahlien yienghneix naeuz le, ndawsim Daegmingz youh siliengz youh diemzsubsub, siliengz dwg bonjfaenh guhgyaj yaeuh Dahlien; diemzsubsub dwg Dahlien caen simndei, mbouj yiemz ndaw ranz bonjfaenh youh gungz youh gaeuq youh uq, bonjfaenh ciuhvunz neix caen miz fukheiq lo.

Gij saeh cei youqgaen maranz couhdwg hawj bohme doengzeiq Daegmingz caeuq Dahlien baenzgya, bohme caeuq caencik yawjraen Dahlien youh roxsoq youh sienhsoh, doeklaeng gyoengqvunz cungj gig muenxeiq. Ndawsim Daegmingz lumj hai va nei, ngoenzgoenz angqvauvau bak riu cungj haep mbouj ndaej bae.

Daegmingz caeuq Dahlien ma daengz Haijnanzdauj le, couh cingqsik yiengq bohme Dahlien gangjmingz gij eiqsei song vunz yaek baenzgya.

“Mbouj ndaej! Neix mbouj dwg vamoq cap haeu goeng haexvaiz bae

ha, va caiq rang hix bienq haeu liux bae.” Daxme Dahlien nyinhnaeuz, Haijnanz seiqcawq miz vunzfouq, vihmaz mbouj haq, gvaq saedcej fouqmiz mbouj ndaej ha, bienbien siengj bae diegggae dieggungz youq ranznaez, dangciengz couh mbouj doengzeiq.

Daegmingz caeuq Dahlien mboujdan dwg sai mizcaiz mbwk baenzsau, youh cingz ngamj eiq hab, caen dwg mbouj miz maz ndei deudik dem lo. Gangj cien gangj fanh, bohme Dahlien couhdwg yiemz ndaw ranz Daegmingz daiq gungzhoj lai, lau dahlwg haq gvaqbae le souh haemz gwn hoj, saedcej gvaq ndaej mbouj ndei. Doiq cungj siengjap bohme Dahlien, Daegmingz senq couh liuhsiengj ndaej daengz lo.

Hoeng, ndawsim Dahlien mbouj deng doenghngauz saekdi, de cigsoh youh byotbyat doiq daxme de naeuz: “Meh, mbouj miz naez haex haeu, haex rang daj gyawz daeuj, Daegmingz ranz caiq gungzhoj, gou cungj gaen dingh de lo.”

Daxboh Dahlien nyaenx mbouj ndaej haibak cam Daegmingz naeuz: “Mwngz miz maz bonjsaeh aeu dahlwg gou guh yah?”

“Gungz hix siengj bienq couh gamj youq gwnz rin ndaem va.” Daxboh Dahlien cam ndaej haeu ndok, Daegmingz hix han ndaej haeu ngviz youh miz seieiq.

Gyoengqvunz ciengzseiz naeuz: Sau hung mbouj hab louz, lwg hung mbouj youz meh, bohme baenzbaenz cungj euq mbouj gvaq lwglan. “Gawq-yienz dwg ndaw fwn daeuj, ndaw raemx bae, couh aeueiq gij genjleh lwgsau ba.” Daxboh Dahlien yawjraen Daegmingz mboujdan ukgyaeu cinglingz, dungxmaeg hix mbouj loek,

couh hai bakgim han naeuz, daxme Dahlien cijndaej gvan ciengq baz riengz youzcaih gyoengqde suenq lu.

Baenzgya le, Daegmingz caeuq Dahlien saedcej gvaq ndaej youh vuenyungz youh cwxcaih, doengx-ngoenz song vunz fwngz yien fwngz bae hwnjban, doengxhaemh song vunz doq cejgoj doq guh hongranz, sim diemz lumj bouxsien gvaq ndwen-ngoenz nei. Bi daihngaih, Dahlien seng daeglwg ndeu le, couh swnh gvaq cieng, Daegmingz caeuq Dahlien daiq daeglwg baema ranzmbanj raen bohme. Hoeng, ngamq daengz mbanjranz ndaej song ngoenz, daeglwg couh deng dwgliengz fatndat lo, siengj cawx di yw he hawj daeglwg gwn, byaij doh daengx aen haw cungj ra mbouj miz, daengx ranz vunz simgip ndaej cienqlolo.

“Boh, aen danci cuengq youq gyawz la, gou gwih bae ndaw singz cawx yw hawj lwg.” Daegmingz simgip dwk cam daxboh naeuz.

“Lwg ha, ranz raeuz gyawz miz danci ho, bi’ gvaq mwngz maranz, aen densi caeuq danci cungj dwg ciq bouxwnq ma baijiengh hane, daxboh mwngz gyawz miz cienz cawx ya.” Daxboh siliengz dwk gejnaeuz.

Daegmingz roxnyinh ndawranz caen gungzhoj dangqmaz lo, lau mehyah dingqnyi le hojsouh, cijndei vaiq fung bak daxboh naeuz: “Gaej caiq gangj roengzbae dem lo.”

Dahlien cingqngamj umj daeglwg byaij gvaqdaej, dingqnyi bohlwg gangj vah le, doeksaetyat, ndawranz caen beij bonjfaenh siengj haenx gungzhoj ndaej lai lo. Raemxda nyaenx mbouj ndaej sikhaek conh okdaej, lij caengz ndaej uet bae, couh deng Daegmingz yawjraen lo.

(*caengz sat*)

Danq Aencingz Dangj

□ Veiz Gunghyungz bien Vangz Handez cingjleix / 韦公荣 编 黄汉铁 整理

Baezneix youh hwng guh hawfwen,
Haemhlwenz angq ndaej mbouj laep da;
Mboujlwnh gizgwnz caeuq gizlaj,
Sim ’angq couh lumj dujva hai.

Cwngcwz hailangh ndaej daenj lengj,
Bengx raen mehmbwk bouxboux maez;
Bouxminz daengx bi cungj vuenheij,
Mwhneix beixnuengx lak lumj sien.

Caetit haucau geiqniemh dangj,
Beksingq fanndang youq ngoenzneix;
Aencingz duh dangj cungj aeu geiq,
Hai seizdaih moq vih beksingq.

Miz Siz Ginbingz gvaqdaej swnj,
Bouxminz miz gwn sim oijdingh;
Ciuq fap ceih guek biengz cij bingz,
Daengx guek beksingq gvaq ndaej ndei.

Seizneix lajmbanj bienq yiengh laux,
Mbanj iq mbanj laux miz laeuzfangz;
Guh ranz bingzding hangz dam hangz,
Ranzranz dajcang caen gyaeunde.

Gaijgwz hailangh ngamq fouqmiz,
Rom ngaenz bibyai dawz ranz cang;
Gwn imq youq ndei gvaq ndaej an,
Bongh coh siujgangh gyo ’mbaiq dangj.

Gocoengz goj ndaej maj cien bi,
Gyo ’mbaiq cujsiz Siz Ginbingz;
Lingjdauj daengx guek raeuz bouxminz,
Ndwenngoenz menhmenh cingq bienq ndei.

Cingcawz nduknaeuh guh daengz daej,
Caezgya doengz guh rengz cij hung;
Seizseiz rom rengz coh naj bungz;
Couh lumj raemxgiengh cung laj dat.



Raemx saw faex mwn gingjsaek gyaeu.

Dozsw